

**Kalaallit Nunatsinni pisortatigoortumik Nunatta Katersugaasivianut Allagaateqarfianullu atasussamik kulturikkut eriagisariaqartut illersorneqarsinnaasumik toqqorsiveqalernissaanut Naalakkersuisut pilersitsinissamut suliaqaqqullugit Inatsisartut aaliangiiffigisassaattut siunnersuut.**

(Inatsisartuni ilaasortaq, Aleqa Hammond Siumut)

### **Akissuteqaat**

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

### **Siullermeerinnineq**

Naalakkersuisut Nunatta Katersugaasiviani Allagaateqarfianilu toqqorsiveqalernissamik siunnersuummut qujapput.

Siunnersuut Nunatta Katersugaasivianut Allagaateqarfianullu ilaatigut iliuusissatut pilersaarutini pitsaanngitsuni pitsaanerusumik toqqorsiveqalernissamik pisariaqartitsinermik ukiorpassuarni erseqqissaasarsimanermut innersuussisumut tusarniaassutigineqarpoq.

Katersugaasivik inissaaleqiffiuvoq kiisalu kulturikkut eriagisarialinnut katersukkanut pigisanullu ullutsinnut naleqquttumik isumannaatsunillu, kiisalu aalajaatsumik silaannaligaasinnaasumik toqqorsivimmik amigaateqarfiulluni.

NKA ullumikkut illuutitoqqani arlalinni siammarsimasunik toqqorsiveqarpoq eriagisarialinnulli pissutsit kulturikkut oqaluttuarisaanermi pigisarpasuit isumannaallisarneqarnissaannut ullumikkut nunami katersugaasivimmut minnerpaatut piumasaqaatigineqartut malinneqaratik.

Ilisimatitsissutigineqarpoq pigisanik qangarnisanik katersineq ilaatigullu eqqumiitsulianik pisiortorneq ukiuni kingullerni killeqarsimasut, inissaaleqissussineq pitsaasumillu toqqorsivissaqaqannginneq pissutigalugit.

Nunatta Katersugaasivia Allagaateqarfialu naliliivoq Nunatsinni katersugaasivinnut tamanut Nuummi illuummik toqqorsivissamik ataatsimoorussamik silaannarmik aqutsiviusumik, asiunaveersaanermut immikkoortulimmik, kiisalu kulturikkut oqaluttuarisaanermi pigisanut, assinut eqqumiitsulianullu tunngatillugu sannavilimmik, inuillu saanikuinut qituttortanullu nillartaatitsivilimmik peqalernissaq aaqqiissutaassasoq pitsaanerpaaq.

Saanikut kalaallillu inuit timaanik katersat suli Københavns Universitetimi Antropologisk Laboratorium på Retsmedicinsk Institutimiitineqarput. Taakku tassaapput saanikut assaanernit nassaat, 2000-it sinnillit, piffissanit itsarsuarneersut oqaluttuarisaanermeersullu. Katersat ilarpasui inunneersuupput (inuup saarni il.il.) paniinnarnikut (pingaartumik inuit timaat timaasalu pisataat paniinnarnikut) uumasuneersullu.

Annerusumik pitsaanerusumillu toqqorsiveqarnissamik pisariaqartitsinerup naalakkersuisoqarnerni arlalinni saqqummiunneqartarsimanera Naalakkersuisut ilisimavaat.

Taamaattorli katersugaasivimmi toqqorsivissap taama ittup qanoq akeqarnissaanik naatsorsuinernik peqartoqanngimmat Naalakkersuisut tunngavissaqarsorinngilaat tunngavissat saqqummiunneqartut tunngavigalugit siunnersuutip isummerfiginissaa, taamaattumik inassutigineqarpoq taamatut isikkoqartillugu akuerineqassanngitsoq.

Naalakkersuisulli makku misissorneqarnissaannut suliniuteqarniarput;

Toqqorsivimmik pilersitsinissamut suut periarfissaappat?

Illuummi taama ittumi ingerlatat sorliit ass. ingerlanneqarsinnaanersut?

Nutaamik toqqorsiveqalernikkut toqqorsiviit inillu sorliit atorunnaassappat?

Pingaartumillu pilersitsinermut, ingerlatsinermut akissarsianullu tunngatillugu aningaasaqarnikkut suut tunngavigineqassanersut.